



止園集卷二十二

延陵吳亮采于甫著

啓

賀南直學院史武麟

道啓昌期萬里慶風雲之會天開文治三吳愜山斗  
之瞻樹物表之型模動區中之踴躍恭惟臺下氣配  
河山節堅金石鳳千仞而下德大吐氣於君子正人  
豸一角而觸邪惟正色於險夫媚士肅在山虎豹方  
埋都下之輪除當道豺狼宜攬留中之轡共仰狂瀾  
之砥柱矧推名世之宗工繡節耀南都棧樸菁莪十

四郡之奎光增煥文旌麗東井詩書禮樂二百年之  
泰運宏開寧詎國是攸關實爲道脈所係法星初曜  
羣材濟濟領春風化雨均沾多士彬彬歸大造伏念  
某倖隨臺案今屬屢珉榮命初聞皈誠尤快肅修短  
幅少伸燕賀之忱祇獻崇階仰竇龍光之重伏祈俯  
鑒曷任顛瞻

答撫院劉健菴

辟車峻秩夙推安攘之勲專席雄班式荷保釐之寄  
睠以股肱之重地聿求心膂之世臣寵錫岩廊懽騰  
震海恭惟老年伯臺下名世宗工清朝碩望安危注

意威稜遠聳乎三階文武壯猷譽命已躋于八座元  
戎受制未雨徹桑土之防桀虜跳梁先聲奪旃裘之  
魄聖明簡在恩眷鼎來以我公歸入領北軍之重自  
天子所遠昭南仲之威此儒者之極榮亦國家之盛  
事不肖某才同樗櫟臭附芝蘭遙瞻父執以景行久  
佩師言而祇服重屨鼎翰更辱豐儀謹拜手以登嘉  
敢齋心而矢謝揄揚莫罄銘鏤無涯臨楮不勝感仰  
瞻依之至

答史武麟

恭惟臺下海內龍門河東鳳羽剛大而養以直氣塞

兩間高明而道則中蒙開萬古帝念祖宗棧樸之地  
實關英俊薪禎之途瀆藉鴻儒特隆駿命望驄行于  
白下俄驚漢代威儀振虎踞于金陵寧數隋朝詞賦  
以馭吏之心馭士品題高下掃除月露風雲由掄文  
之法掄材殿最低昂相盡驪黃牝牡于今獨盛亘古  
有光乃當駢駢靡及之時猶荷眷眷不忘之寵豐儀  
申錫鼎翰遠頒慚芹曝之未伸辱瓊瑤之再報感惟  
踳地懼且循墻尺牘難宣寸衷易結謦咳暫違于兩  
地併懔永戴乎二天

與工部左堂王弘陽

望崇九寓升華允若乎予工位近三台渙寵旋熙乎  
帝載慶貽宗社歡洽朝紳恭惟老年伯臺下百年名  
碩一代具瞻正氣凌霄屹中流之砥柱清風振世聳  
東魯之高山輿論共推宸衷獨簡雅望方資于定辟  
新綸暫借以司平肅六府而用修宅百揆以時敘國  
崇元老將鼎鉉自此而允升朝用正人庶泰茅從茲  
而彙進帝聞曳履士用彈冠伏念某才不如人分叨  
猶子素佩師言而祇服遙瞻父執以景行盛事躬逢  
懽情倍切叩九闈而馳候希一介以攄衷莫罄菲忱  
仰祈茹納

與吏部孫立亭

治均四海元勳冠八座之尊望重三台太宰列六卿  
之長帝惟求舊邦用維新恭惟台臺嶽瀆真精乾坤  
間氣確然不拔操持特秉乎剛方公爾無私權柄肯  
移于宵小久結知于日月猶待感于風雷十五年暫  
卧東山寤寐弗告四千里復還北闕夢卜九賢正士  
升華將泰茅從茲彙進元臣弼直惟師言誰不欽承  
國是永清世道攸賴伏念某下僚末品遠塞孤踪遙  
瞻鼎鉉之崇徒切升階之仰敢謂託身于後武庶幾  
拭目乎太平肅具荒函恭申賀臆

與順天撫院劉健菴

龍節高懸威望夙隆于薊北麟符特畀聲華久著于  
師中勲垂瀚海陰山名覆金甌玉檢萬殊闔澤九鼎  
尊疆恭惟老年伯臺下堪輿間氣社稷元僚身係安  
危寢四郊之多壘才兼文武作萬里之長城芝檢屢  
膺樞庭迅陟自天子重北門之鎖鑰已寬東顧之憂  
而胡人憚西府之運籌敢縱南下之牧有世臣之謂  
也舍我公其誰哉伏念某辱以通家芘于宸宇茲奉  
邊陲之役益勤巖石之瞻敢介不腆之儀用伸未將  
之敬有如權覲未旣敷陳

與吏部蕭玄圃

玉堂隆重銓卿已屬于鴻儒水鑑清通法從仍推夫  
少宰並陟崇嚴之地特兼華要之階簪笏騰權冠裳  
胥慶恭惟台臺經綸學術黼黻才猷草視鑿坡金蓮  
徹御前之燭麻宣鰲禁瓊花錫掖左之春膺帝簡以  
握銓衡代天工而司黜陟智巧無留于根柢賢愚共  
效其涓埃玉燭自調金甌已覆伏念某猥以凡庸濫  
叨任使心懸仰斗徒厯想于龍門職繫觀風愧羈踪  
于雁塞敬陳荒啟聊布芹忱恃明信之可羞幸汪涵  
之用鑒

請撫院霍南溟

三雲星聚寧詎徼十日之驩兩地萍分當且抱三秋  
之感擬申下悃載設初筵恭惟台臺氣涵剛大性秉  
中和庭下芝蘭已作傳家琬琰邊頭節鉞遂成奕世  
弓裘當安危注意之時須文武兼資之略蠢虜盡縻  
戎索名王將受綸封卽晉秩于中樞方書勲于上考  
不佞猥奉邊陲之役益隆岩石之瞻分手有期傾心  
無既謹詹甲日肅效寅忱難輸報李之私未卜班荆  
之日仰祈光賁益重皈依

與漕撫李脩吾

台垣著望位躋八座之尊開府崇勲寵荷九重之眷  
簪紳胥慶寰海均瞻恭惟台臺道裕經綸氣完剛大  
玉瑩冰鑑大盱豪傑之衡芒刃斧斤盡褫姦邪之魄  
兼漕于撫藉畢公之保釐者十一年觀水于源倚神  
禹之奠敷者數千里惟台履已徧豐沛蕭碭之境乃  
廟堂特總吳越齊楚之權姓名久覆于金甌勲業永  
調乎玉燭想人情賢于夢卜佇望黃扉惟德望重于  
斗山旋膺紫綬當侈明時之盛事可稱曠古之奇逢  
伏念某辱以通家庇于宸宇况在受廛之列益厘仰  
厦之私敢介不腆之儀用伸未將之敬有如懽覲未

罄敷陳

賀撫院霍南溟

生第七子

台臺勲茂麒麟祥生鸞鶴襲六爲七寧數郭令之駢  
蕃則百斯千應衍姬孫之昌熾若不佞多男實爲累  
徒詒豚犬之嗤而生子如仲謀乃見貂蟬之盛適當  
彌月竊拜下風敬因下逮之仁輒效上交之賀儀雖  
藉手感實銘心不任悃誠伏惟涵鑒

賀山西撫院魏惺吾

地雄重鎮安攘允賴龍韜天眷碩臣鎖鑰特頒鳳詔  
邊疆懽動社稷慶流恭惟台臺河洛儲英嶽嵩毓秀

安危注意一方久覩塞帷文武憲邦八座盡爲推轂  
爰受九重之寵獨提三晉之衡豸省建牙旌搖落櫬  
槍之影雁門擁節鉞坐消關塞之煙會見折箠以鞭  
四夷行將歸袞以報天子不佞叨役邊隅幸依隣壤  
斗山在望喜聞鼎命之新雲樹相思莫罄豫鳴之悃  
敢馳一介敬上八行伏冀台慈俯垂炤納

答薊遼總督王霽宇

北門鎖鑰夙推文武之兼材左輔金湯式荷安攘之  
重寄萬殊闔懌九鼎尊強恭惟老年伯臺下堪輿間  
氣社稷世臣風猷久著于邊陲恩信允孚于夷狄折

衝千里先聲寢黠虜之謀爲憲萬邦獨斷折盈庭之  
議清商傳細柳風雲長護諸陵白羽映長楊星斗自  
懸三輔捧北極重輪之日撐東隱半壁之天共欽方  
叔之壯猷行被晉公之新命伏念某猥以通家芘于  
宸宇素佩師言而祇服遙瞻父執以景行豈洪鈞不  
棄管蒯之微乃鼎翰特錫瓊瑤之貺感而益悚受之  
若驚尺楫聊附于回翔寸抱第增乎搖曳有懷飯遡  
未旣敷宣

答督撫中秋

清秋建纛安邊據虎豹之威明月登臺款塞落豺狼



之膽驩聲雷動佳景天開伏念其謀非屬國何能尺  
組繫名王見泥書生徒以空言招罪戾尚藉運壽之  
略少寬斧鉞之誅乃辱台慈過蒙鼎祝金莖玉露分  
天上之珍貽桂馥蘭芬望雲中而賡頌敬憑去雁附  
謝來魚感愧之私筆楮難罄

與餉部曹還素中秋

老年丈手握璣衡心涵宇宙壁輪圓滿精神洞察乎  
秋毫水鏡光明度量平分乎灝氣不佞弟幸攀瓊樹  
久挹金莖依惟月之清輝借使星之瑞彩玉人在望  
珍貺頻施欣歌白苧之章如薦紅雲之會投如明月

報之夜光惟此耿衷願言澄照

與都察院詹賀壽

海屋添籌遐福特隆于栢府台垣絢彩純禧益篤于  
蘭臺喜介高齡敬申華祝恭惟老先生台座天上福  
星人間名世以四十年甲第耆碩熙朝際五百載昌  
期表儀烏署况值萬壽允升之日正當七日來復之  
期忠結九重功叅一氣臺中瑞藹宇內歡騰職心切  
台階跡羈行部望斗杓而致祝願福履之永綏瞻申  
嶽以載呼望天休之滋至商衡夙贊躋千歲而慶衍  
長春帝昴常調朋三壽而澤流函夏職不勝欣躍禱

祈之至

與按院王鏡予

繡斧時巡聲震風霆之烈彤輪報命身依日月之光  
績奏澄清恩崇寵眷恭惟臺下氣表山河節堅金石  
燃藜鳳閣文章雅重于玉堂列栢烏臺綱紀特伸于  
鐵柱鳳九苞而下德共瞻岡上之梧桐豸一角而獨  
邪誰採山中之藜藿六轡攬勾餘之勝雙旌澄滄海  
之波茲喜及瓜暫遄行李益注棲鳥之眷戀爭傳避  
馬之威名譽命鼎新褒嘉師錫不佞弟幸隨貢籍復  
厠臺班欣看持斧之來莫遂執爨之願敬申不腆用

表未將恃蒞藻之可羞豈瓊瑤之能報伏惟鑒納不  
任瞻馳

壽撫院霍南溟

天開姬曆甫俟鍾崧嶽之靈運啓漢符蕭相應昴星  
之瑞屬懸弧之令節當臥鼓之昌期三壽作朋四夷  
畢獻恭惟臺下心游密勿道合貞符聖世宗工瑤冊  
輝煌于宇宙清時填撫雄風震疊于宣雲祝頌弘深  
允稱難老五百年而間出永符名世之英八千歲以  
爲春宜享永年之福某欣逢嶽降願祝華封難展樂  
只之章曷罄承筐之獻伏惟鑒察俯賜莞存

壽餉部曹還素

景星下耀欣逢鶴算之初長計府懸弧喜見鴻禧之  
倍錫歡騰中外慶動華夷恭惟老年丈秀擅三齊才  
雄萬斛經文緯武哀然邊塞干城定國安邦允矣朔  
方鎖鑰茲當陽德方亨之日正值嶽神誕世之辰浮  
瑞氣于雲中茂衍無疆之佑光紫微于天上長膺不  
老之休其也辱愛甚深戴德更切欲效華封之祝莫  
遂鳧趨謹陳沼沚之毛用伸燕賀伏惟鑒納不旣光  
榮

答督撫重陽

籬菊爲誰開又換一年好景囊篋空自把忽經九日  
流光節物遠遺眷私特被不佞某羈棲遊子糾纏塵  
人尚櫻彭澤之冠寧落孟嘉之帽神隨白鴈形比黃  
花誰憐客裏之身還送愁邊之酒荷蒙雅雅貺仰仞高  
情摘霜葉以泛觴強酬佳節對燈花而修報恭謝隆  
施

與督撫重陽

天高地迥正當紫塞清秋暑往寒來又是黃花時候  
呼韓稽角車書與玉帛來同欵市犁庭順治並威嚴  
胥奏凡茲駿烈俱屬鴻猷伏念某報國徒勤籌邊無

山齋集 卷三十一  
筵張扼吭拊背之勢豈有微能成運臂使指之功尚  
資石畫秋空萬里仰霜鶚以橫飛陶澤一樽效白衣  
而上獻用供菜賞特進菊觴伏冀海涵曷任顒望

賀總督馬鳳麓考滿

獨坐天高虎帳雄千年之保障專城地重龍旂肅萬  
里之威靈惟有元老之壯猷斯致華夷之率服綏寧  
惟德鎖鑰在人恭惟臺下間氣鍾英貞元毓秀制日  
中之虜呼韓稽首以獻琛運掌上之奇可汗傾心而  
歸市靈旗斜指毋勞漢將增兵銅獸俯臨坐見雲邊  
警息功已成于題柱寵方眷于宸衷茲當考績之期

更荷酬勲之典殊恩絢采于竹帛異數超軼于古今  
慶動簪紳歡勝海宇某躬逢成事徼藉洪沐莫遂鳧  
趨聊申燕賀

與山西主考

百年文運天開禮樂絢堯階之綵三晉名賢奎聚聲  
華軼周室之英會侈風雲光騰日月恭惟老年丈熙  
朝威鳳盛世神龍爰樹昭代之羽儀來作斯文之衡  
鑑惟 聖天子念文體之日壞孰收砥柱之功使大  
宗工挽士習之風靡大破雕虫之技許樞曹之暫輟  
秉鉛槧以來臨辨白璧于塵中誰謂目迷五色拾青

錢于選內可憑頭點朱衣詎止王師且之崇雅黜浮  
真是韓昌黎之起衰濟弱第省方有媿造士無奇幸  
託大厦之萬間叨潤洪河之千里瞻清光于咫尺未  
遂樞承走荒牘以逡巡實虞塵溷仰祈淵炤不任斗  
瞻

答總督馬鳳麓

明主思危式重救寧之偉績元臣攘外誕膺崇報之  
殊恩寵溢群寮慶騰九塞恭惟台臺一代偉人三朝  
碩輔運籌虎帳已銷萬里之塵揚武龍沙聿定千秋  
之業軍民獲有安堵廟社倚爲長城今享其休伊誰  
之賜微儀展賀輜褻懷慚詎厯台念之注存反辱豐  
儀之還答重違嚴命肅拜登嘉率勒蕪詞附鳴謝悃  
伏惟慈鑒曷勝瞻依

與薊遼總督王舜宇

元臣樹闡外之儀光動九邊草木上相表師中之烈  
塵清萬里山河穹眷方隆輿情胥賴恭惟台臺德奠  
地維位高天柱樞垣運畫提重鎮以控八蠻制府持  
衡蒞峻秩以貞百度駿烈嘉元老之壯猷鴻恩錫明  
王之異數幹微權銷餘孽軍氓就枕席之安飭憲紀  
振雄關將吏肅激揚之度功已成于破虜爵且進乎

通侯九重垂帶礪之盟百世紀旂常之烈某才同樗  
櫟役在邊陲夙叨福曜之光厚竊天河之潤風高薊  
北望中雲樹偏遙日遠遼陽夢裏斗山自繞辱瑤函  
之先及欲報德而未能修荒牘以上塵愧享儀之不  
及仰祈淵炤無任冰兢

答鄧來沙

九霄鳴鳳檐鳩藉附羽之榮萬里行驄涸鮒慶沾鱗  
之潤二天在望兩地興思恭惟老公祖譽重南州名  
依北斗負至大至剛之浩氣慷慨埋輪蘊不吐不茹  
之高標從容攬轡文采鑄錦心于藜館威儀仰鐵面

于栢臺帝衷獨眷夫三吳簡命端承于四郡值災沴  
凋殘之後共披滿路仁風矧俗流澆兢之時咸仰在  
瀾砥柱塗歌巷誦嶽動山搖佇膺鈞軸之司懋建規  
條之業伏念某躡影後塵受廬下邑沐洪潤豈惟九  
里庇廣厦何止千間更辱台慈俯垂存注珍貺遠頒  
于塞北瑤函忽墜于雲中跽捧驚慚廻環頂戴寸抱  
益增于搖曳尺楫聊附于回翔詞不宣心感惟沒齒  
某無任企仰瞻依之至

答禮部林平華

翔鸞集鳳天符開奧于一同馴雉懸魚吏治襲熙于

三異謠興章甫寵賜綸書恭惟臺下器宇玉溫丰神  
金粹桑麻無恙歌漢吏之循良桃李不言詠周詩之  
豈弟旌書蔚起薦剡交騰亟膺臺察之掄揚特簡宸  
衷之眷注擬銜蘭省儼冰玉以俱清行晉瑣闥望斗  
山之屹重不佞某倖隨藉雋更屬隣氓藉厚比于二  
天沾慈波于九里深懷怙恃久曠馳驅辱鼎貺之先  
施荷豐儀之遠及益厯感佩殊切悚惶謹藉手以報  
瑣第藏心而刻鏤仰祈崇炤不任下誠

賀無院薛青雷

地雄重鎮安攘允賴龍韜天眷碩臣鎖鑰特頒鳳詔

邊陲聲動軍士驩騰恭惟台臺體道匡時含靈命世  
勁朽孤松節槩轟雷掣電才華漢庭高獻替之風舊  
知名于瑣闥楚甸懋將明之烈屢振采于臬藩指顧  
銷橫豎之魂呼吸定逆宗之變揆留皇鑒忠簡帝心  
爰晉秩于中台特秉旄于上谷百僚承式萬旅欽光  
草木盡偃乎風威夷虜素聞其名姓會見折箠以制  
羗胡之命行看舞羽以貽社稷之休不佞某叨役巡  
方念瓜期之將及乞靈開府望節鉞之遙臨肅附公  
差敬陳私悃尺牘未申夫賀燕寸衷渴俟乎登龍伏  
冀淵慈宥其唐突

與撫院霍南溟賀冬

暖浮葭琯生和氣于乾坤瑞靄栢臺揭晴光于霄漢  
千祥駢集萬彙昭蘇恭惟臺下正氣匡時至誠知化  
安攘功高榆塞壯風雲之烈綏懷德茂栢臺增雲物  
之輝睠茲七日之來茂迓九天之眷繡裳赤舄贊大  
造以轉洪鈞柔荔芳芸應昌期而引蕃錫不佞某自  
慚逐日幸托垂雲喜君子之道亨擬華封之善頌爰  
將芹獻奉佐玳筵伏冀鑒存可勝抃企

與總督馬鳳麓

黃鍾協律一陽當來復之期紫塞凝祥萬物慶大生

之候懽騰夷夏慶溢邊陲恭惟台臺六符應運五石  
補天安壤功高榆嶺壯風霆之烈綏懷德茂栢臺增  
雲物之輝序立八風曾得鼎以推策令行四塞爭獻  
履而迎祥邊庭無狼虎之煙廊廟盡麒麟之閣某材  
慙樗櫟灰驗蒹葭喜陽德之方亨慶台恩之優渥敬  
祝赤松而爲壽恭獻青芹以表誠伏祈臺慈特賜睿  
納願言雀躍可任馳神

答督撫賀冬

紫塞陽回萬彙咸熙于化日洪鈞氣轉千官齊拱乎  
福星夷夏騰歡地天交泰恭惟台臺譽聞西土鎖鑰



北門不振乾綱褫虜酋而奪之魄重宣陽德莫赤子  
而使之安磊落掀天折紛糾解如風雨威嚴動地肅  
邊鎮震若雷霆式逢剛長之辰群陰退聽茂擁大來  
之慶諸福駢臻某欣逢佳節緬仰高風方伸至歲之  
儀遽荷先春之賜薰心布謝頓首陳詞伏惟台涵不  
勝馳遡

與應天巡撫徐檢吾

建節南畿丕著保釐之緯績頒綸北闕茂膺師錫之  
森恩光華近逼乎台垣慶忭遠騰乎階塞恭惟老公  
祖峻節凌霄精忠貫日韞藉兼資文武謀猷久繫安

危遂協廷推特承宸簡鎮天塹二百年國憲喜看鴻  
雁來歸總金陵十一郡臺綱驚見鯨鯢遠遁事權獨  
重名位彌崇福星重耀于雲間化雨載沾于日下伏  
念某偶從御李深荷采葑一廛幸託于趨風萬厦永  
依乎覆露忽聞榮命尤切飯誠少將燕賀之儀竊效  
蛩鳴之響尚願收外治于內治化贊垂裳進介卿而  
冢卿班聯曳履

與代王

南星呈瑞式符玉派之昌期北嶽降神永衍天潢之  
命脈世躋壽域化洽春臺恭遇 殿下千秋華誕萬

福宏開青鸞紫氣當筵擬莊叟靈椿八百文曲長庚  
並躍收曼倩桃實三千某荒塞遠羈媿乏瓊瑤之獻  
蕪詞竊比聊陳山阜之章伏願令名地久天長遐算  
日升川至琪園瑞靄年年披雲錦而獻長春寶殿香  
浮歲歲捧霞觴而介上壽

答戶部杜友白

才裕邊儲偉略獨雄于塞北情殷年譜豐儀先逮于  
雲中仰仞謙光俯屢震惕恭惟臺下清時砥柱名世  
寶臣先熊軾而馳聲竹林濟美趨鯉庭而承學版部  
流芳希司上谷之儲特被中朝之簡貔師萬旅曾無

枵腹之虞虎甲千屯共戴投醪之惠邊庾永賴紳弁  
追思不佞某幸通世籍弟兄竊附于同門更藉天緣  
公祖實憐于大厦觀風承乏愧揚激之未能計歲閱  
勞擬揄揚而莫罄忽承珍貺遠辱溫詞實浹踵以懷  
慚敢藉手而圖報有同登受仰冀垂原臨楮可勝瞻  
遡

與通政曲帶河

口代天言作帝王之喉舌身依斗極敷臣庶之腎腸  
望徹銀臺名高玉陛恭惟台臺執心夷粹秉德溫恭  
補禁闈之闕遺直節久稱鳴鳳作江淮之保障芳猷

夙著行騶京兆寧數趙張閩閩無論王謝晉司理匪  
渙奉明綸命汝納言謀猷入告于后導人使諫膏澤  
必下于民在一時爲千載之逢豈九閩有萬里之隔  
不佞叨役出巡時勤入奏企龍光之在望將燕賀以  
攄忱敢藉納交祗修故事伏惟涵納不任瞻馳

與真定撫院王柱石

辟車峻秩夙推文武之兼材專席雄班式荷保釐之  
重寄睠以股肱之首地宜求心膂之世臣寵錫巖廊  
懽騰瀛海恭惟台臺昭代正人明時碩望崑崙特立  
操持素秉乎剛方濟濟同升簡拔盡由于清秘暫從

南國繡裳之借過膺北畿節鉞之尊允協與情仰知  
宸眷窠詎聯垣篋以合奏且將躋鼎鉉以咸登何意  
熙朝覩茲盛事不佞某才同樗櫟德佩梓桑遙瞻栢  
府以景行密邇榆關之丰采敬裁不斐肅致未將聊  
申賀厦之忱竊附受廛之誼俯慚輶瀆仰冀淵涵臨  
楮不勝馳遡

與總督年節

堯年起丙九邊傳鳳曆之書夏正建寅三鎮頌麟圖  
之烈福應帝祉喜徧人寰恭惟台臺胄盛韋平才侔  
日奠辰逢太簇春布三十六宮符應上台恩覃七十

二侯威行秉鉞寧直宣畫雞之猷恩洽升車不啻普  
放鳩之澤洪業久聞於帝座崇階特進於台衡勛猷  
勒景襄之鍾姓字著凌煙之閣某役及瓜期芘更奠  
朔謹率三朝之典敬獻五辛之盤伏望台慈特加鑒  
納

與撫院年節

青陽獻歲千門瑞啓於椒盤紫極回春四始和凝於  
栢府欣逢元節宜叩履端恭惟台臺秀毓三光精含  
二氣風清紫塞潛消朔漠之寒陰日麗轅門頓起邊  
圉之春色四時合德誰云北斗無心萬物生輝信道

東王有脚駿烈同歲功並茂鴻禧與春令俱新不佞  
某遙挹陽春敢忘賀厦薄將芹藻效頌椒花伏冀台  
慈俯垂鑒納

與戶部曹還素

歲統開端授四時而資始王正啟序布百度以維新  
適際亨嘉茂膺多福恭惟老年丈望隆山斗德粹中  
和勲業匡時信是鹽梅霖雨文章經世共傳白雪陽  
春維茲三陽開泰之期正值萬祉其凝之會九天春  
色隨麗日以頒來五夜陰氛逐條風而盡歛暖鶯鶯  
于喬木婉若揚麻輕燕燕于彫梁依然効順某叨共

事瞻北斗其非遙仰荷深仁與東皇而靡極敢擬陳  
筐之禮特效薦辛之遺仰冀涵茹不任瞻企

與總督馬鳳麓生日

弧懸卿月喬雲綉彩於穹霄算益台星曜騰輝於制  
府紳弁共祈純嘏耄倪胥慶繁禧恭惟台臺振寓人  
龍鳴陽士鳳眉山鍾淑氣誕申卓爾多奇錦水孕殊  
英生甫居然特異當九重之特注共瞻鎖鑰壯猷作  
萬里之長城允愜桑蓬夙志月臨虎建瑞啓麟符太  
簇芳辰應桂魄初圓于十五長庚令旦兆椿齡允介  
乎八千瑞鶴獻靈芝喜伴瑤琴承繾綣祥烏棲古栢

榮開玳宴對綢繆匪直常觀日月之升恒且將永奠  
乾坤于悠久某叨聯籍講快覩籌添敬祝華封肅將  
芹獻伏願鼎鼐調元鞏固金甌於萬世崑峒問道摩  
娑銅狄于億年

賀撫院薛青雷入境

桃山春曉麟符分卿月之輝榆嶺雲開虎節占使星  
之動先聲所至諸路騰懽恭惟台臺祥發丹巖靈鍾  
赤厓久繫蒼生之望特膺紫綬之徵命下九重共慶  
祥麟瑞鳳威行萬里爭看韜虎鈴龍聲動前茅光生  
細柳不佞某濫竽執簡祗役及瓜惟願一望下風庶

幾不負平日盼龍文之紫氣有懷擁篲之私抒燕賀  
之丹忱莫勝彈冠之喜敬弔下吏恭迓前旌附獻一  
芹聊當三接臨風爲溯計日以湏臨楮可勝延佇

賀撫院薛青雷

上任

憲府崇嚴獨坐列星辰之席戎軒赫濯前茅揭日月  
之旂道遠曷云能來心夷亦旣覲止欣然倒屣率爾  
披函恭惟台臺一腔正氣八面雄才韜鈴兼文武之  
資鎖鑰重安攘之託藉旌麾于節鎮總綱紀于蘭臺  
輿望咸歸帝心特簡九重延佇可勝計日以湏十乘  
啟行恍若從天而下軍民懽慶忽聞時雨之來蘇草

木光華頃覺春風之倍煦不佞某幸隨李御獲遂荆  
瞻謹消吉以戒賓筵祇齋心而迎法駕席前借箸精  
神折尊俎之衝柱下彈冠談笑仰步趨之矩伏惟俞  
允曷任顙祈

答撫院王柱石

建節畿南丕著保釐之偉績投械塞北忽承剪拂之  
殊榮拜德懷慚開函動色恭惟老公祖臺下精忠貫  
日峻節凌霄當安危注意之秋湏文武兼資之略譽  
命特隆于八座威稜遠讐乎三垂簡在宸衷式孚輿  
望惟是狂瀾旣倒誰司世道之奔流砥柱不搖獨藉

明臺之坐鎮伏念某分甘灰沒情切巖瞻偶緣一介  
之上通豈辱十行之俯及拜嘉有愧銘鏤無涯幸矣  
及瓜將乞骸以歸于隴畝睠焉列栢恐終身遂隔于  
門墻遙仰汪慈祗陳淵悃伏願繡裳倏召總持正綱  
紀之衡赤舄同升並奏吹埴篨之樂

答馬鳳麓賀命登第

朝廷設科日用取瑋材閎閱衍箕裘號稱喬木是非  
鴻碩曷副鷹揚詎意寒門復叨隆選恭惟台臺識空  
臺駿誼及屋烏觀人文而必欲假之羽毛愛吾弟不  
啻視如手足適館授粲特撫下濟之光按籍問名尚

念同升之雅狂簡無忘于小子遭逢利見乎大人先  
甲後庚歷三紀而恰當四戍同寅協丙闈八荒而藹  
若一家凡茲剪拂之前途靡匪栽培之洪造駒血久  
淹轅下壯志堪憐鳳毛載起池邊德輝斯覽若爲兄  
若爲弟幸竊過庭之餘至于再至于三益凜循墻之  
懼溫詞見藉鼎貺寵頒誦以迴環拜而驚悚居然沾  
異渥竟莫報乎瓊瑤何以指迷津幸無遺于金玉肅  
伸謝悃不盡馳神

謝馬鳳麓

榆塞觀民深負簡書之重棘闈薦士聿聞奏牘之新

百朋忽枉乎華箋兩鎮遂傳爲盛事恭惟台臺昭代  
名臣清門世胄秉笏紹祖孫于三世運籌安社稷于  
萬年教本文翁道學已乎巴蜀材同蘇子聲名不減  
眉山豈辱獎題幸通講籍鯤之大幾千里而化爲鵬  
公其選也鳥之繫累百數而不如鶚僕之謂歟昨者  
諸昆羣然偕計夙無操挾庶幾解額之寬積有僥逾  
聊奉慈顏之喜乃暗中之摸索忝進士于南宮欲直  
上而吹嗟藉主人于北道特勤鼎使端錫豐儀委白  
選以流輝映青箱而動色情敦介弟雁行若切于孔  
懷念及老親鶴算願同于罔極仁人欲立欲達願所

蒙矣君子善頌善禱何以報之感惟在心謝寧啻口  
濡毫草草愧四六之未工束帛芟芟知萬一之難稱  
統祈崇炤俯賜淵涵

與順天撫院劉健菴

賀子登第

北門鎖鑰方隆制閩之權南斗文章忽動禮闈之色  
聿求家學蔚起國禎喜溢簪紳懽騰朝野恭惟老年  
伯臺下專槐世業喬木名家龍圖宣黼黻之猷麟筆  
紹縹緗之緒庚牌布令甲第流芳赫赫上卿勲業與  
河山並永振振公子聲華偕日月重新鄉之元會之  
魁兩榜冠羣英唾手功名真如拾芥周公前魯公後



三台贊八極盈牀袍笏豈羨分茅君臣五百載竒逢  
增輝赤舄父子四十年聯續復點朱衣架上詩書已  
作傳家琬琰邊頭節鉞遂成奕世弓裘惟至平通格  
于天故盛德克昌厥後伏念其幸徼倚玉快聽泥金  
矧魯衛亦忝齊盟將王謝再修世譜其爲懽怍尤倍  
恒情敬摠賀厦之忱益締通家之誼儀寧及物詞未  
宣心伏冀麾函可勝慶仰

與王東白蕭玄圃主試

玉堂金馬黃扉需鼎鉉之良北斗泰山彤管握文章  
之命快覩明時之鉅典欣逢昭代之鴻儒拜手颺言

傾心篋頌恭惟台臺文裁帝袞學冠儒纓得全全昌  
萃光嶽未分之氣先覺覺後讀丘索以來之書當弘  
文班馬之儔負接武夔龍之望命自天而載錫材與  
地以雙清頃闕禮闈丕承宸簡三千禮樂已歸大冶  
之鑪錘九萬鵬鵬盡借長風而變化士固伸于知己  
忠莫盛于得人豈意寒門亦叨隆選公論咸稱其具  
眼五色不迷私衷實倍于銘心百朋莫報久切高山  
之景行益懷流水之知音肅勒荒函聊申墳奏棣華  
韡韡敢云難弟難兄棫樸芄芄勉爾爲綱爲紀庶不  
辜春草生花之夢或可酬泰茅連茹之恩意傾嚮而

彌勤詞鄙訥而難盡敢辭唐突李賜淵涵

答劉健菴

朝廷設科目用取瑋材闕闕衍箕裘號稱喬木自非  
名碩曷副顯揚詎意寒宗叨從華選恭惟老年伯臺  
下昭代名臣清門世胄文武爲萬邦之憲安攘貽億  
載之休令嗣世兄黼藻雄文珪璋粹質省會擅無雙  
之譽京闈標第五之名闢天府而開科共稱得雋敞  
霜臺而報捷僉曰象賢榜朝出而姓氏夕播于四方  
錄一傳而紙價頃增于百倍誠是父而是子將爾公  
而爾侯何幸介弟之有緣獲附魁儒而並薦烏之繫

累百數而不如鶚尚愧卑棲鯢之大幾千里而化爲  
鵬佇看遠徙偶將燕賀轉辱鴻施誦以廻環拜而驚  
悚居然沾異渥投桃莫稱夫瓊瑤何以指迷津削楨  
猶希乎金玉肅伸謝悃不任馳神

答劉遼總督王霽宇

雲邊薇戍仰微露庇于周星風憲瓜期忽荷天恩于  
曠日漸睽斗望節貢台箋恭惟老年伯臺下堪輿間  
氣社稷世臣運貌虎于胸中布龍蛇于掌上自東自  
西自南自北安攘夙著于三隣議撫議勦議貢議封  
操縱悉裁于獨斷節旌監鎮方頌爾公爾侯珂佩登

朝更羨難兄難弟允昭國憲益茂家猷伏念某稟性  
迂踈賦材綿薄澄清寡效毫無補于官方狂慙多尤  
終有慚于言路茲幸得弛重負庶幾獲遂初衣驄御  
代更已作歸去來兮之賦龍光遠隔徒懷侯誰在矣  
之章何意卑遐復厯高厚損駢蕃之異渥敢不登嘉  
拊依怙之微悰可勝悵惘肅緘書而申謝惟憑楮以  
馳神統冀台慈俯垂崇矜

又

樞極崇懸憲府列星辰之席寵靈遠被通家沐雨露  
之施方切依皈矧厯挹注恭惟老年伯臺下殿邦偉

望經世殊勳鎖鑰關門頓息烽烟之警綢繆牖戶豫  
周陰雨之防名震華戎功高屏翰蓋四夷種落獫狁  
素號天驕而九塞錯綜馮翊尤憑地險其以省方之  
役實蒙保障之休幸及瓜期敢忘河潤更慚草野終  
荷海涵指駒谷以言旋宜安薄劣望龍門而陡絕徒  
仰高深何知還闕之期猶切當關之慮先聲破敵足  
占元老之壯猷上兵伐謀常操中國之勝筭惟翹首  
以需鼎鉉將拭目以觀泰平竊以處堂芘于宸宇謹  
端下走肅介微忱詞不盡于對揚心永期于藏佩率  
焉手勒悵矣神馳

止園集 卷二十一  
與總督馬鳳麓

策府書庸炳旂常之日月楓宸注寵煥綸綍于雲霄  
燕喜非常龍光有赫恭惟台臺中朝魁碩振古人豪  
文經武緯之才嶽峙淵停之度威靈濯濯名王益輯  
于羈縻猷績烺烺信史不勝其紀述予曰有禦侮可  
戰而亦可和帝謂救公功懋官而因懋賞恩沾四代  
徵善慶之豐培命錫九重詔聲華之遐邇不佞某欣  
逢盛事喜倍恒情不腆筐承意式均于雀賀有嚴瓜  
代力莫遂于鳧趨伏冀麾存有如懽覲

答馬鳳麓

勲紀太常三錫渙絲綸之寵誼叨世講一械將筐篚  
之忱豈荷報瓊益慚引玉恭惟台臺爽邦鉅望經世  
鴻猷兼文武以摠謀酌寬嚴而布令日成月要歲會  
功名備載于春秋王功國勲民庸績叙允禪于社稷  
卽勤勞之懋著宜恩數之隆頒台階光麗乎四星崇  
秩游登乎八座萃夷忻仰朝野聳聞不佞某感深覆  
露職愧觀風當茲大慶之辰與有同休之誼偶裁短  
楮用布鄙私方慚輶褻之如毛乃辱報將之若響敬  
三薰而拜使實百倍其主臣不盡縷衷統惟淵炤

與鹽院張覺菴

璇霄明法象光膺玉綵以觀風繡斧肅清霜瑞擁花  
騶而按部權騰吳越慶溢商民恭惟老公祖正氣峻  
憎貞心粹白讜論力扶國是弘摹丕振臺綱惟九重  
獨注于鹽齏乃屢請專承乎簡命權隆司筴澄清瀚  
海之餘波用作和梅調燮鼎彝之正味寧詎福詒兆  
姓抑將利賴九邊樹物表之型模動區中之踴躍不  
佞某蚊負微材鷓班弱羽幸隨臺案今屬塵氓乃榮  
命之初聞實皈誠之尤快肅修短幅薄侑菲將聊申  
燕賀之忱仰瀆龍光之重伏祈俯鑒曷任顙瞻

答馬總督

以下歸田

北塞馳驅久藉憐憫于露庇東山偃息忽傳訛訊于  
雲箋盛德永光幽人增貢恭惟台臺中朝魁碩振古  
名豪道德冠乎人倫事功本之學術聲威赫濯名王  
益戢于羈縻猷績炳烺信史不勝其紀述伏念某澄  
清寡效慙直多尤偶厠顏行荷推心誼其人非玉指  
駒谷以言旋投我如瓊豈蚤山之能負真搗謙以下  
士一貴一賤乃見交情況錫類而及親三沐三薰敢  
忘明德盖高盖厚未知圖報之年爲草爲環盡是結  
銜之地耿焉佩戴逝矣瞻馳附申尺寸之忱不盡覲  
縷之悃統祈崇炤可任下誠

山園集 卷二十一  
答霍撫臺

恭惟台臺文武兼資材誠兩合三雲重鎮特隆旄鉞  
之司五部名王盡仰冠裳之化虛舟涵茹容千萬斛  
而有餘利办解批更十九年而不折貳而執服而舍  
榆塞威行居則愛去則思棠陰惠浹豈意百叅無益  
一范不留若非帷幄之籌詎落瓊裘之膽某倖叨共  
事竊附同心恨無策以攀援徒撫懷而激烈遁思孔  
迫指駒谷以言旋離棕莫伸望燕山而凝佇忽承貺  
及尤切魂搖况錫類而及親三沐三薰敢忘明德真  
為謙而下士一貴一賤乃見交情未知報塞之時惟  
是結銜之感耿焉佩戴逃矣瞻馳附將尺寸之忱不  
罄觀縷之悃統祈崇炤幸甚

答鹽院張覺菴

驄馬翱翔于曉甸風采傍傳皂鵬奮振于秋空霜威  
正布坐見塵氛之滌濯寧惟山岳之動搖四境肅然  
萬民祗若恭惟老公祖鼎衡夙望黼藻宏猷一角神  
羊抗丰稜于柱下九苞彩鳳振韶律于臺端貞憲度  
以無前仰大觀之在上星軺初指磬磬絕鴻雁之聲  
風裁自持凜凜奪豺狼之氣國計與軍儲並裕民艱  
及商困交紆誠千載之一時實九重之獨簡某浹沾

慈渥倍切權棕第慚不肖之身恐玷維新之治阻脩  
竿牘正切逡巡過辱悒悒忽承翰貺寵違其質庸知  
負譴之深情溢乎詞良荷軫懷之厚酬知無地報德  
何年不盡瞻馳惟有銜結

答趙儕鶴

恭惟台臺兩間灑氣一代偉人辨官論材惟一毫之  
莫爽嫉邪秉正雖百折而不回當已年弊吏之時適  
壬人柄政之日憑天威以震撼身退而名益尊仰風  
節之峻嶒事久而論愈定掛冠已幾二十載推轂何  
啻千百人華夷咸識其姓名朝野共占其出處不孝

某材慚樸藪性類桂薑矢補牘以昌言願執鞭所忻  
慕蓋薦賢爲國之誼希效涓埃若痛親知己之懷徒  
勒泉壤而已昨者家兄待罪下邑望鄰燭之借光台  
臺推念通家俾堂琴之增響况蒙齒及尤切心銘幸  
削牘之有郵恨識荆之無地敢嫌僭越聊布瞻依伏  
冀台慈俯垂崇炤

答梁慎台

皂蓋朱旛剖竹新乘五馬華函亦牘折梅遠錫雙魚  
深軫陳人曲敦雅好恭惟門下天中駿望日下鴻名  
粉署含香播風猷于南國雄關榷稅凜冰蘖于西湖

昌時羨鳳翼之高騫重地借牛刀以小試帝心特簡  
皇鑒揆留方欣竊夫未光乃特煦之餘潤溫詞下逮  
賢十部之見臨腆貺遙頒荷五漿之先饋但慚衰朽  
過辱注存百結深藏一絲附報實勞瞻邇曷罄敷宣

與姜養和

子登科

恭惟令郎老親丈簪纓華胄忠孝名家巍科接三世  
之傳大業增八座之色瓊枝挾藻久誇譽重南金芝  
峽騰輝更羨名依北斗蓋天意未喪斯文之脈豈人  
情能尼吾道之行若孫繼祖子繼父不過士人榮遇  
之常而臣報君子報親實乃家國稱塞之路諒不望  
平生之溫飽猶足寒未死之姦諛不肖猥辱末知喜  
聞榮捷相期非淺胥慶何深敢肅致乎菲儀亦少伸  
夫芹悃伏祈俯納曷任仰瞻

疏

齋僧募緣疏

蓋聞孔過陳蔡尚爾絕糧佛在王城居然乞食仰稽  
菩薩俯應閻浮證常住者爰訖乳糜補尊位者猶假  
香飭就齋龍海皆種仙禾卽憇珠庭並資靈粟况髡  
顛行脚業已輕棄其鄉然離裏屬毛誰非弱喪之子  
日之夕矣空憐革履雙携夜如何其未許桑門三宿



祈寒暑雨四時天氣總愁人南北東西萬里關山誰  
是主闕焉接待念此化離於是有僧某者願以智慧  
火燒煩惱薪乞焦穀芽作伊蒲供揣食而日需五斗  
米聊復繩繩而繼三百六旬之中合糈而歲得三十  
人便可源源而來一萬八千之衆凡施者凡半施者  
總是因緣或募者或代募者孰非擅越香厨濟濟何  
如劫火蒸沙高廩戕戕寧俟迦留乞麩行見水乘杯  
陸飛錫咸赴慈雲佇看鳥投果鹿銜花同餐甘露闍  
黎卽次齊鳴鷲嶺之鍾暘燧初升競洗龍池之鉢噴  
大衆如京如坻而如泡如影須知易盡百年不耕不  
織而不饑不寒當念難消一粒乞資朱屋徧諭素心  
財法雙施人天獲福

攀鼎良因疏

天寧爲祝聖道場楞嚴乃證佛密義寺僧宗遠延請  
佛若長老宣揚祝讚功行精虔洵一勝事且以蒼旻  
降沴 二聖賓天青海生波萬靈塗地仰燕山而  
涕隕望遼水而鳧飛雖草莽臣咸有攀鼎之痛卽藜  
藿士寧無伏劍之悲特叩大檀齊修小果藉一部如  
來之妙諦消衆生已往之叢誓斯亦無漏因緣不可  
思議之功德也仗茲諸賢信同發菩提心誰爲善護

待圓成吉祥願



